

Послание от инока к инокине

Благу и бес порока приязнь имущу ко убогим нам, преукрашенной невесте безсмертнаго жениха, юностну виду, краснейшу и сладчайшу и честнейшу паче всех сверстниц, в ту сущем месте иночествующих, очи ко всех творцу всегда имеюще, и зрящей свет непреступный, ушима же слушающе божие слово всегда и радующеся, устнем хваляща господа всегда и к своим привлекающе того устам, языком же и гортанем словеса божиа разсуждающе и божественую сладость множаще, сердце чисто и несквернено имеюще, желающе бога невидимаго, питанию неизнуряему, вину веселиа, девственую красоту, лица^а добротное, языка хвальное, душа благородие, житиа непорочное, удобрение нрава, образа лепотное, плодовицей маслице в духовных, вести всякоя пречестну дарованию, красному преукрашену украшению, и добрых превелику удобрению, сладчайшиа плотныя ти матере души. К тебе же паки желание привлечит мя. Како изображу лица твоего радостное, и красоту, и честное ти хождение, старческое мудрование во юностнем теле, всегда вредящаго и мягкости отбегание? Родителем плотным и наставнице иже во иноческих добродней, покорливой, и послушливей, слово кротко от несмутны душа произносящей. И что ино реку? Точию святаго духа жилище. Устне твои сот искаплют, мед и млеко под языком твоим. Но како и еще изреци дерзну? Мысль моя убо ужасается, сердце же подвизается, и язык связуется. Не могу удержати сладости, побеждаюся всеми неизчетно добрыми ти и изступаю умом. Побеждает же мя желание».

(ГЛБ, Q.XVII.67, лл. 212 об.—213).

^а В ркп. лиц.